

BON PASCO y Feliz 2024



Diaranson 27 December 2023

Email: IslaOnline@gobierno.aw Tel: 528-4952



ISLA ONLINE

Noticia Transparente di Gobierno





**BON PASCO
y Feliz 2024**



Evelyn Wever-Croes
PRIME MINISTER

FUTURA: 2023 AÑA DI CAMBIO DEN TECHNOLOGIA

E aña 2023 a marca un punto importante pa FUTURA, unda e fundacion a logra transforma e panorama educativo y tecnologico di Aruba. Cu un enfoque firme riba integracion di tecnologia y innovacion, Futura a pone su marca riba e futuro di enseñansa.



UN COMIENZO VIBRANTE: LANSAMIENTO DI IDENTIDAD Y WEBSITE

FUTURA a cuminsa e aña cu un gran paso 'pa lanta' su imagen, revelando un identidad visual fresco y un website nobo. E esfuersonan aki no tabata solamente cosmetico; nan a simbolisa un renacimiento, un etapa nobo pa FUTURA y cla pa e retonan di futuro.

INNOVACION DEN EDUCACION: EDUTECH Y MO-B LAB

E curason di e aña tabata enfoca riba e proyecto Edutech, cu a mira trabounan intensivo pa integra tecnologia den scolnan.

Un total di 12 scol a ricibi fondonan pa ehecuta nan proyectonan. Scolnan entre otro: Colegio Bon Bini, EPI (Educational Institute), Aurora Scol Preparatorio, EduCampus Aruba, Pius X School, Universidad di Aruba, St. Dominicus College, y Scol Preparatorio Nos Paraiso, a beneficia directamente di e fondo, loke a transforma e manera cu educacion ta wordo entrega.

Simultaneamente, e proyecto Mo-B Lab, financia pa EU, a sigui fasina y inspira studiantenan cu su 'Mobile Makerspace'. E proyecto a demostra cu e innovacion por ta tanto divertido como educativo, y e a yuda studiantenan pa explora tereno nobo den ciencia y tecnologia.

EMPODERANDO E SIUGIENTE GENERACION: KIDSPRENEUR\$ Y COLABORACION CU MASTERCARD

FUTURA su enfoke riba e futuro no tabata limita na e klasnan di scol. E colaboracion cu IDEA den e programa Kidspreneur\$ a introduci conceptonan di entrepreneurship na hobennan, preparando nan pa un mundo cu ta cambia rapidamente. Y, den colaboracion cu MasterCard, FUTURA a busca diferente manera pa revolucionisa e paisahe digital di Aruba, poniendo un enfoke special riba fortalecimiento di SMEnan local.

RECONOCIMIENTO Y RENOVACION: METABOLIC FOUNDATION Y FUTURA SPACES

E esfuersonan di FUTURA no a pasa desapercibi; e proyecto Surfside Science di Metabolic Foundation a ricibi un mencion honorable di EU, un testimonio di su enfoke innovativo. Ademá, e renovacion di Futura Spaces a refleha un compromiso pa un ambiente di trabou mas creativo y inspira.

UN CELEBRACION DI EDUTECH Y MAKERPEDIA

E aña a cera cu un celebracion impresionante di e logronan bou di e iniciativa di Edutech Fund, y e Makerpedia Camp, cu a enfoca riba e temanan di STEAM, a demostra cu e potencial creativo y innovativo di e generacion hoben ta sin limite.


CU MIRA PA FUTURO

Pa 2024 FUTURA lo lansa varios proyecto nobo entre otro STEMX Youth Summit den februari, Bio/Agri-Lab, y tambe Science Fair. Ademá FUTURA lo organisa un biaha mas e Aruba Innovation Summit 2024 na maart.


Pa FUTURA 2023 tabata un aña di crecimiento, innovacion, y cambio. Cu cada proyecto y colaboracion, FUTURA no solamente a transforma e comunidad, pero tambe a planta simia pa un futuro unda innovacion, tecnologia y educacion ta cana hunto creando un paisahe nobo pa Aruba y su hubentud. E aña aki a demostra cu FUTURA ta cla pa sigui guia e caminda pa un futuro mas prospero pa nos pais.



we are
FUTURA
Aruba Innovation Lab













BON PASCO
y Feliz 2024



Endy Croes
MINISTER

A INFORMA SIMAR DI E INVERSIONAN GRANDI CU GOBIERNO DI ARUBA TA HACIENDO DEN ENSEÑANSA



Recientemente, Minister di Enseñansa y Deporte Endy Croes a reuni cu presidente di SIMAR Sra. Angelique Quijada y Sr. Gabriel Boekhoudt hurista di SIMAR. Durante e reunion nan a trece preocupacion di algun docente ariba nan schalering. Ademá di esaki, a trece dilanti locual a trata durante e Presupuesto Supletorio 2023 den Parlamento di Aruba. Ta trata di un pregunta cu Minister Endy Croes a haya di un parlamentario tocante algun placa cu a resta di enseñansa cu a bay pa proyectonan andando den deporte.

Minister Endy Croes a splica SIMAR cu esaki tabata placa di salario di e directivanan di scol cu no a wordo uza y cu si no wordo uza pa ley ta perd'e dia 31 di december. Pues, pa e placa no bay perdi a uza e placa aki pa otro proyectonan andando, cual ta proyecto di renobacion di Compleho Deportivo Guillermo Prospero Trinidad y Palo Marga. Ademá di esaki, Minister Endy Croes a splica SIMAR cu mester wak

e "bigger picture". E aña aki Gobierno di Aruba a logra subi e normbedrag despues di 10 aña na 6.4 milyon florin, cual ta e placa cu ta bay via explotatiesubsidie pa tur directiva di scol. Fuera di esaki, Gobierno di Aruba a aproba 6.7 milyon florin pa un scol completamente nobo pa Juliana School y otro 2.6 milyon florin pa e di dos fase di construccion di Mon Plaisir College Havo.

Pues, e mandatario di Enseñansa ta indica cu mester evalua e reclamo cu ta haciendo pa algun 100 mil florin di salario di docente cu a uza pa proyectonan andando den deporte y analisa cu Gobierno di Aruba ta haciendo inversionan mas grandi den enseñansa, entre otro, 6.4 milyon florin na normbedrag, 6.7 milyon florin den un scol nobo pa Juliana School Mavo y 2.6 milyon florin den e di dos fase di construccion den un scol nobo pa Mon Plaisir College Havo.

MINISTER ENDY CROES A ATENDE E CENA DI PASCO DI IBISA

En conexion cu e celebracion di Pasco, Minister Endy Croes a bishita e cena di Pasco di IBiSA. Ekipo di maneho y staf di IBiSA a honra e empleadonan, kendenan ta lanta marduga den weekend pa organisa tur e careda- y eventonan deportivo manera: landamento, triatlon, aquatlon y pa tur e trabounan cu nan ta ehersce na scol fuera di orario normal di trabou.

Tambe durante e anochi special aki, IBiSA a reconoce cinco (5) empleado esta, Francis Tromp, Will Erasmus, Charlene Geerman, Kamilah Dammers y Wladimir Wolff cu durante aña 2023 no a meld ziek, pues dus tabatin 0 “ziektemelding”.

Adicionalmente, IBiSA a reconoce Kamilah Dammers y Esmond Jones como empleado di aña 2023. Pa conclui, Minister Endy Croes ta gradici e empleadonan di IBiSA pa e excelente trabou cu nan ta ehersce y pa nan dedicacion y colaboracion durante aña 2023. Alabes Minister Endy Croes ta desea henter Pueblo di Aruba un prospero aña 2024.



Minister Endy Croes:

DESPUES DI SHETE AÑA PUEBLO DI ARUBA POR A APOYA NOS SELECCION FEMENINO DI FUTBOL NA CAS

**Stadion Dakota ta un hoyo di proyecto cu ta cumpli cu standard
internacional di FIFA**



Dia 4 di december ultimo, Seleccion Femenino di Aruba a hunga nan ultimo wega pa e aña aki contra ekipo di Belize na Compleho Deportivo Guillermo Prospero Trinidad na Dakota. Minister Endy Croes tabata presente pa duna apoyo y sosten na nos Seleccion Femenino di futbol. E tabata un tremendo partido di futbol, unda cu nos seleccion a demostra un nivel halto di futbol. E wega tabata hopi emocionante yena di suspenso y e tabata hopi cera unda cu na 83 minuut Belize a anota e unico goal di e partido. Esaki tabata e ultimo wega

di futbol, despues e stadion lo permanece cera te cu otro aña maart pa asina finalisa e proyecto di renobacion. Despues di shete (7) aña Aruba por a disfruta y apoya Seleccion di Aruba na cas atrobe, den un stadion cu ta cumpliendo cu tur standard internacional di FIFA.

“Nos ta sigui contribui na e desaroyo di deporte di Aruba den su totalidad”, Minister Endy Croes ta finalisa. Cu deseo, disciplina, determinacion y dedicacion ta logra.



Un aña mas ta terminando
pa nos duna inicio na un aña nobo, aña 2024.
Nos pais a mustra resiliencia den aña 2023.
E rais di e caracter resiliente di Aruba
ta bin for di nos prome habitantenan
kendenan a traha un fundeshi fuerte.

Nan esfuerso pa construi e economia di nos pais,
ta nos inspiracion pa keda un nacion balente y
determina pa traha hunto pa nos pais progresa.

E Pioneronan di nos destinacion,
a crea un legado di norma y balornan
cu ta defini nos como Arubianonan.

For di e ritmo di nos musica te cu e saludo cordial,
e Arubiano semper a biba orguyoso di su cultura.

Aruba ta un diamante den Caribe,
cu ta wordo defini pa
e amabilidad y cordialidad sincero
cu nos ta brinda na otro y na nos bishitantenan.

Esaki ta nos herencia.
Nos ehempel pa sigui construi
un caminda di intergridad y amor
pa e generacionnan nos dilanti
y crea un futuro cu ta refleha soñonan nobo.

Den e temporada aki, laga nos refleha
riba nos historia di forsa y perseverancia.
Nos ta un pais resiliente, uni, cu norma y balor,
balente y creativo, amabel y cordial.

Ricibi den nomber di Gobierno di Aruba,
e miho deseonan pa un bon Pasco y un prospero
aña nobo, yena cu hopi bendicion y felicidad.

Bon Pasco y Feliz Aña Nobo


PROME MINISTER

Evelyn Wever-Croes





BON PASCO y Feliz 2024



Mientras nos ta acercando e final di
año 2023, laga nos celebra e
cualidadnan remarcabel cu ta defini
nos como un nacion admirabel.
Nos ta un pueblo cu compacion,
determinacion y abilidad pa bin
hunto den momentonan di
necesidad. Ban drenta e Aña Nobo
lagando e caracteristicanan
admirabel aki sigui guia nos na
halturanan mas grandi.
Gobierno di Aruba ta gradici tur
ciudadano admirabel pa nan
esfuersonan pa progreso, union y
compasion.

Gobierno di Aruba ta manda
deseonan di un Pasco yena di
alegria y un Aña Nobo yena di
bon promesanan.

Nas ta un pais
ADMIRABEL